



Broj: 01/1-02-1975/14
Ilijaš, 30.10.2014. godine

Z A P I S N I K

sa 23. (dvadesettreće) sjednice Općinskog vijeća Ilijaš održane dana 30.10.2014. godine, sa početkom u 10h.

Dvadesettrećom sjednicom OV-a Ilijaš je predsjedavao predsjedavajući OV-a g-din Damir Filipović.

Prisutni vijećnici:

RB.	IME I PREZIME
SDA	
1	MAHIR DEVIĆ
2	NEDIM MATORUGA
3	SAUDIN DURMIĆ
4	HALID DIZDAREVIĆ
5	AMAR DOVADŽIJA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
SDP	
10	ALAN ŠERAK
11	MARIONETA ILIĆ-JURETA
12	DAMIR FILIPOVIĆ
13	SELVER HERIĆ
SBB	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
SAMOSTALNI VIJEĆNICI	
18	EDHEM HASANOVIĆ
19	ASIM MUJIĆ
20	NIHAD BUČUK
21	ENES DIZDAREVIĆ
STRANKA ZA SREDNJE	
22	BESIM GLJIVA
23	AIDA MALIŠEVIĆ

	LDS
24	NIJAZ RASTODER
	BPS
25	MUHAMED HANDŽIĆ

Prisutni gosti:

1. Semir Spahić - Radio Ilijaš
2. RTV Vogošća
3. Mirsad Hamzić – predsjednik Savjeta MZ Malešići
4. Meho Tabaković – predsjednik Savjeta MZ Ljubina
5. Almir Špodić – predsjednik Savjeta MZ Podlugovi
6. Alen Matoruga – predsjednik Savjeta MZ Misoča
7. Denis Kahrman – predstavnik Uprave za šumarstvo KS
8. Mirsad Čehajić – predstavnik JP “Sarajevo-šume”

Ostali prisutni:

1. Akif Fazlić – općinski načelnik
2. Sadeta Brkić – pomoćnik načelnika
3. Alma Imamović – pomoćnik načelnika
4. Zdravko Barić – pomoćnik načelnika
5. Nijaz Spahić – pomoćnik načelnika
6. Merima Osmanović – pomoćnik načelnika
7. Sanja Zagorac-Jozić – pomoćnik načelnika
8. Ilda Kahrman – sekretar OV-a
9. Mersa Zeković – stručni saradnik u Službi za prostorno uređenje i stambeno-komunalne poslove
10. Adha Masnopita – stručni saradnik u Službi za društvene djelatnosti
11. Maida Habibović – zapisničar.

Predsjedavajući je otvorio sjednicu i konstatovao da postoji kvorum za odlučivanje.

Zatim je dao na razmatranje zapisnik sa 22. sjednice OV-a Ilijaš.

Primjedbi na zapisnik nije bilo, pa je OV-e jednoglasno usvojilo zapisnik sa 22. sjednice OV-a Ilijaš.

Pročitao je predloženi dnevni red i dao na razmatranje.

Adem Efendić – vijećnik SBB BiH – Ilijaš

Postavio bih pitanje da nam se pojasni zbog čega bi trebali donositi zaključak o ponovnom vraćanju tačke na dnevni red prije isteka roka o šest mjeseci (Prijedlog Odluke o davanju saglasnosti za zaključenje ugovora o korištenju gradskog nogometnog stadiona u Ilijašu) ? Nisam protiv da odluka dođe na dnevni red prije isteka roka od šest mjeseci, ali da nam se pojasni zbog čega je to hitnost?

AKIF FAZLIĆ – općinski načelnik

Ovaj prijedlog koji je na dnevnom redu proizvod je situacije i potrebe da što prije riješimo upravljanje gradskim stadionom. Kao predlagači ove tačke, želim reći da smo imali

zajadnički sastanak sa Kolegijem OV-a Ilijaš koji je prihvatio inicijativu da ovo uvrstimo u današnji dnevni red i ovim putem se zahvaljujem. Ovaj period je obilježio stvaranje novih klubova i da bi ovo sve bilo regularno i da bi smo omogućili transparentno korištenje stadiona želimo da što prije dođe na dnevni red razmatranje jednog prijedloga kojim ćemo definisati sve potrebne uslove za korištenje gradskog stadiona. Još jednom molim OV-e da podrži ovu inicijativu i da što prije riješimo ovo pitanje.

Diskutatana po pitanju dnevnog reda više nije bilo, pa je OV-e jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 22. sjednice (zaključaka na 22.sjednici nije bilo)
3. Prijedlog Zaključka o ponovnom vraćanju tačke na dnevni red prije isteka roka od šest mjeseci (Prijedlog Odluke o davanju saglasnosti za zaključenje ugovora o korištenju gradskog nogometnog stadiona u Ilijašu)
4. Prijedlog Odluka o:
 - a) usvajanju Regulacionog plana "Alića Gaj"
 - b) provođenju Regulacionog plana "Alića Gaj"
5. Prijedlog Odluke o davanju pozitivnog mišljenja na ŠPP "Gornjebosansko"-dio
6. Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br.265/9 i k.č.br.265/10)
7. Prijedlog Rješenja:
 - a) o razrješenju člana, a time i zamjenika predsjednika Komisije za prostorno uređenje, stambeno-komunalne poslove i ekologiju
 - b) o izboru člana, a time i zamjenika predsjednika Komisije za prostorno uređenje, stambeno-komunalne poslove i ekologiju
 - c) o razrješenju člana Komisije za boračka pitanja
 - d) o izboru člana Komisije za boračka pitanja
 - e) o izboru člana Komisije za mlade i obrazovanje
8. Prijedlog Rješenja iz imovinsko-pravne oblasti:
 - a) broj:06/1-31-659/14
 - b) broj:06/1-31-4183/13
9. Prijedlog Zaključka kojim se utvrđuje javni interes za općinu Ilijaš izgradnja kompleksa proizvodnih objekata (farme za tov pilića sa preradom)
10. Informacija o uspjehu i odgoju učenika u osnovnim i srednjim školama, na području općine Ilijaš u školskoj 2013/2014. godini.

AD-1

Vijećnička pitanja i inicijative

ALAN ŠERAK – vijećnik SDP-a

Inicijativa:

1. Pokrećem inicijativu da nadležna inspekcija izađe na lokalitet Ljubine i ustanovi zakonitost izgradnje potpornih zidova i ostalih objekata što za posljedicu ima sužavanje rijeke Ljubine, te naloži istom da se nelegalna izgradnja obustavi i da se spriječi daljnja izgradnja kako ne bi došlo do neželjenih posljedica.

MARIONETA ILIĆ-JURETA – vijećnica SDP-a

Inicijativa:

1. Pokrećem inicijativu da današnje dnevnice od vijećničkih paušala budu uplaćene za užine djeci u Osnovnoj školi Srednje, čiji su roditelji u teškom imovinskom stanju, a koji moraju gladni čekati i po dva sata dok ne dođe školski autobus.
Predlažem da se Općinsko vijeće o ovoj inicijativi izjasni u vidu zaključka.
2. Pokrećem inicijativu da se obezbjedi 8 (osam) rogova dugih 6 (šest) metara za rekonstrukciju krova na Domu kulture u Ljubina, jer će isti, ukoliko bude puno snijega, pasti i samim tim će šteta biti veća. Ugradnju će obezbjediti stanovnici MZ Ljubina.
3. Ispoštovati obećanje i dogovoreno, te opremiti kancelariju MZ Ljubina, za koju je potrebno: 1 (jedna) protivprovalna vrata, kompjuter, štampač, kopir aparat, internet priključak, te sitni kancelarijski materijal.

Pitanje:

1. Hrvatsko kulturno društvo Napredak je zainteresovan za organizaciju Božićnog domjenka ili proslave, pa pitanje glasi: Postoji li neki natječaj za organizovanje istog, te kome se treba obratiti i s kim dogovoriti?

ADEM EFENDIĆ – vijećnik SBB BiH-Ilijaš

Što se tiče inicijative kolegice Marionete da se odrekenom današnjih dnevnica za užinu djece u O.Š. "Srednje", želim reći da Klub vijećnika SBB-a neće podržati ovu inicijativu iz razloga što smo u februaru donijeli program mjera ušteda gdje u jednom članu stoji da su predviđena sredstva za užine djece u stanju socijalne potrebe.

Sada Vi možete postaviti pitanje da li se odluka provodi u cjelosti.

SELVER HERIĆ – vijećnik SDP-a

Inicijativa:

1. U zadnjih deset godina sam tražio proširenje mosta u Srednjem na potezu Osnovna škola – Srednje, ali danas pokrećem inicijativu da nema potrebe taj most proširivati.

Pitanje:

1. Na putu Sarajevo-Tuzla, na ulazu u Donje Čevljanoviće na jednoj krivini se dešavaju saobraćajne nesreće, pogotovo kada pada kiša. Da li je u pitanju pogrešan nagib ili masna cesta, treba provjeriti?
Za jedan mjesec su se desile 22 nesreće na toj krivini.
Stoga tražim da se ovo pitanje uputi Federalnoj ministarstvu prometa i komunikacija, Direkciji za ceste Kantona Sarajevo i općini Ilijaš.

SAUDIN DURMIĆ – vijećnik SDA

Inicijative:

1. Pokrećem inicijativu prema nadležnoj općinskoj službi i Zavodu za javno zdravstvo Kantona Sarajevo da se u narednom periodu iznađu sredstva i izvrši deratizacija vodotoka na području općine Ilijaš.

Obrazloženje: Ovaj problem je izražen na području cijele općine, a naročito uz vodotoke, rijeke, potoke i pojava velikog broja pacova prijeti da ugrozi živote i zdravlje građana. Poznato nam je da u 2013.-2014. godini nije vršena deratizacija na području općine Ilijaš na lokalitetima vodotoka i područja oko istih. Molim nadležne da ovom problemu pristupe ozbiljno.

2. Pokrećem inicijativu prema JKP "Rad" Sarajevo i nadležnoj općinskoj službi, a tiče se opravke posuda za odlaganje smeća na teritoriji općine Ilijaš.

Obrazloženje:

Većina posuda za odlaganje otpada (kontejnera) nama predviđene poklopce koji su u prethodnom periodu skinuti, da li od strane pojedinaca ili su predmet krađe. Prisustvo pasa lualica ovaj problem usložnjava i odloženo smeće u kontejnere raznosi i razbacuje oko istih i po javnim površinama i stvaraju ružnu sliku, a predstavljaju i potencijalnu opasnost širenja zaraze i sl.

NIJAZ RASTODER – vijećnik LDS-a

Inicijativa:

1. Pokrećem inicijativu prema općinskom načelniku i nadležnoj službi da pokrenu postupak za raskid privatizacionog ugovora sa trenutnim vlasnikom nad objektom zvanim Direkcija Željezare ili da se vlasnik natjera da objekat privede namjeni, a koja je vjerujem precizirana ugovorom.

AKIF FAZLIĆ – općinski načelnik

Kada je u pitanju prijedlog vezano za užine i ja preferiram da se Vijeće ne izjašnjava po ovom pitanju. U februaru smo donijeli program socijalnih mjera koji smo definisali i užine. Taj program se realizirao sa završetkom školske godine, ali nažalost nije krenuo u septembru. Nije krenuo, prije svega, zbog proceduralnih problema koje imamo u realizaciji ovog projekta. Preuzimam na sebe da od 03. novembra vidimo kako to riješiti.

Pitanje vezano za Božićni prijem, u dosadašnjem iskustvu nije bilo nikakvog natječaja, jer su to bili pojedinačni zahtjevi i kroz aplikaciju programa smo to podržavali i najbolje bi bilo da i sada zajednički to dogovorimo.

Kada je u pitanju most u Srednjem, želim informisati ovo Vijeće da je općina uradila izvedbeni projekat o potpunoj izgradnji novog moste, jer su stručnjaci procijenili da se ovaj most ne može rekonstruisati. U proljeće smo proveli tender gdje su se javila dva aplikanta, a po javnom natječaju su potrebna tri, pa smo sada u novoj proceduri da definišemo izvođača. Ovaj projekat je aktuelan i pitanje je skorog vremena u smislu njegove realizacije.

Pitanje vijećnika Nijaza Rastodera vezano za Direkciju Željezare Ilijaš: znači, Direkcija Željezare nije privatizirana, ona je kupljena kao imovina. Znači firma koja je prije toga privatizirana i stekla imovinu, ona je prodala kupcu koji je kupio tu imovinu i raspolaže njome. Svi bi mi željeli da se ova imovina stavi u funkciju, međutim to teško ide.

Ono što mi praktično možemo uraditi, a to je pitanje plaćanja komunalnih naknada za prostore, pa onda kada plaćate naknade, to će vas natjerati ili da se riješite te imovine ili da je stavite u funkciju. Mi nemamo zakonski osnov da nekome možemo nalogom naložiti da se pomenuti objekat stavi u funkciju.

MUHAMED HANDŽIĆ – vijećnik BPS-Sefer Halilović

Sa načelnikovim obrazloženjem se ne slažem vezano za objekat Direkcije Željezare. Pitam zbog čega smo usvajali Regulacioni plan Ilijaš Grad i mislim da nije obrazloženje da ne možemo natjerati kupca upravne zgrade Željezara da ono ruglo ne skloni i da nam ne smeta onakvo kakvo jeste. Dakle, ima načina ako hoćemo to da riješimo, postoji regulacioni plan i dati rok vlasniku objekta da ono skloni i uskladi sa Regulacionim planom Ilijaša. Drugo, zahvaljujem se načelniku i službi za socijalnu zaštitu koji su prepoznali značaj moje prošle inicijative za otvaranje javne kuhinje na području općine Ilijaš i nadam se da nekoliko stotina naših građana koji su išli u Sarajevo po svoj obrok, to više neće raditi, jer od ponedjeljka punkt za podjelu hrane radit će u ul. Hašima Spahića na broju 32.

NEDIM MATORUGA – vijećnik SDA

Mene interesuje pravno, jer kolege iz SBB-a su se izjasnile da neće podržati zaključak koji je predložila Marioneta, šta u tom slučaju ako se zaključak izglasa? Interesuje me tumačenje da li je ovo uredu. Sugerisao bih kolegici da povuče ovaj zaključak, jer stanje nije ništa bolje ni u ostalim školama. Veliki je broj socijalnih slučajeva i čeka se odluka općinskog načelnika o rješavanju ovog pitanja. Moja sugestija je da u ovom momentu povučete inicijativu i ako načelnik ništa ne riješi do slijedeće sjednice OV-a, ja ću prvi pokrenuti inicijativu rješavanja ovog problema na taj neki ne propisani način. Ovo bi bilo malo "krpljenje" velikih rupa. Prije svega, izašao sam sa pitanjem kako postupiti, ako ovo usvoji, a vijećnici SBB neće podržati ovu inicijativu?

AKIF FAZLIĆ – općinski načelnik

Još jednom bih zamolio da odustanemo od prijedloga ovog zaključka. Obzirom da ne možemo kroz javnu nabavku ovo realizirati, ići ćemo na odluke dodjele sredstava porodicama od 03. novembra za svu djecu po spisku koje su škole dostavile i da time to riješimo. U prvom polugodištu nismo išli sa tim prijedlogom, jer smo se bojali ako porodice dobiju novac, da li će to dijete dobiti. Ako je ovo prihvatljiv stav koji možemo regularno provesti zajedno sa službom za socijalnu zaštitu da na bazi odluka na imena porodica uplaćujemo sredstva, onda bi to zaista riješili i riješili bi za sve škole za djecu za koju su škole utvrdile da su im potrebna.

MARIONETA ILIĆ-JURETA – vijećnica SDP-a

Žao mi je povući ovu inicijativu, jer znam šta znači čekati dva sata autobus ispred škole, a nemati užine. Žao mi je i da mi dođemo jednom u mjesecu na ovo Vijeće i dobijemo 250 KM paušala. Idem na ljudskost i osjećajnost. Zaista je žalosno da mi razgovaramo o jednoj dnevnicu od 50 KM. Znam da ima gladne djece i u Ilijašu i što se mene tiče ja bih svaku dnevnicu dala za bilo koju školu i bilo koje dijete. Ako mislite da zaključak treba povući samo izvolite.

NIJAZ RASTODER – vijećnik LDS-a

Molim vas nemojte sakupljati političke poene ovako ili onako. Ko hoće da se odrekne dnevnice, neka se odrekne, ali nemojte mene tjerati da to radim, ako meni to nije draga volja. Vi kolegice nas prozivate što imamo 250 KM, ali to nije dan, nego mjesec dana i mi radimo i ne možete "zavlačiti" ruke u tuđe džepove. Korektno je da kažete da se odričete

svog paušala, ali nije korektno da govorite šta ja trebam da radim.

MAHIR DEVIĆ – zamjenik predsjedavajućeg

Ne vjerujem da je kolegici bila namjera da pravi političke poene. Ovdje imamo dvije strane u smislu razumjevanja inicijative. S jedne strane imamo da se ovo pitanje rješava kroz budžet, sistemski kroz čitav program socijalnih mjera i s druge strane, imamo plemenitu inicijativu koju lično pozdravljam. Ne trebamo se mi gordo ponašati spram ovakvih inicijativa. Međutim, možda bi u ovom momentu bilo rješenje, kako raspravu ne bi odugovlačili, da sačekamo kolegice da se ovaj program realizira, a ako se ne realizira mi ćemo se na nekoj narednoj sjednici pojedinačno potpisati ko želi da se odrekne svoje dnevnice, a da to ne namećemo nikome ko to ne želi.

Ja želim da podržim ovu inicijativu i mislim da to i većina želi, ali treba sačekati, jer nije momenat da se ovo rješava na ovakav način kako ste kolegice predložili.

MARIONETA ILIĆ-JURETA – vijećnica SDP-a

Ja ću povući inicijativu, ali predlažem da se vijećnici, koji to žele, pojedinačno izjasne i potpišu da se odriču današnje dnevnice za užinu djece u Osnovnoj školi "Srednje", što su i učinili.

AD-2

Izvještaj o realizaciji zaključaka sa 22. sjednice (zaključaka na 22.sjednici nije bilo)

Zaključaka na prethodnoj sjednici nije bilo.

AD-3

Prijedlog Zaključka o ponovnom vraćanju tačke na dnevni red prije isteka roka od šest mjeseci (Prijedlog Odluke o davanju saglasnosti za zaključenje ugovora o korištenju gradskog nogometnog stadiona u Ilijašu)

Diskutanata po ovoj tački dnevnog reda nije bilo, pa je OV-e Ilijaš sa 22 glasa ZA i 1 PROTIV donijelo

Zaključak o ponovnom vraćanju tačke na dnevni red prije isteka roka od šest mjeseci (Prijedlog Odluke o davanju saglasnosti za zaključenje ugovora o korištenju gradskog nogometnog stadiona u Ilijašu)

AD-4

Prijedlog Odluka o:

- a) usvajanju Regulacionog plana "Alića Gaj"
- b) provođenju Regulacionog plana "Alića Gaj"

DAMIR FILIPOVIĆ – predsjedavajući

Naglasio je da u naslovu Odluke postoji tehnička greška gdje piše Regulacioni plan Podlugovi, a treba da stoji Regulacioni plan Alića Gaj.

Diskutanata po ovoj tački dnevno reda nije bilo, pa je OV-e jednoglasno donijelo

a) Odluku o usvajanju Regulacionog plana "Alića Gaj" i

b) Odluku o provođenju Regulacionog plana "Alića Gaj"

AD-5

Prijedlog Odluke o davanju pozitivnog mišljenja na ŠPP "Gornjebosansko"-dio

DENIS KAHRIMAN – predstavnik Uprave za šumarstvo Kantona Sarajevo

Kao član Komisije koja je davala suglasnost na prijedlog šumsko-privredne osnove reći ću par rečenica. U toku 2011. godine Sarajevo-šume su sklopile ugovor na izvođenju radova na izradi šumsko privredne osnove za Gornjebosansko sa JP "Bosansko-hercegovačke šume". U toku 2012. godine od strane preduzeća JP "BiH-šume" vršeni su terenski radovi, tj. taksaciona snimanja. Međutim, imali smo jedan problem krajem 2011. godine kada je Odlukom Ustavnog suda FBiH stavljena van snage Uredba o šumama, tako da smo tokom 2012. godine imali pravni vakum po pitanju šume i zakonske regulative. U februaru 2013. godine donesen je Kantonalni zakon o šumama kao jedno prelazno rješenje iz razloga što ni dan danas nije donesen Federalni zakon o šumama. U tom zakonu u je došlo do nekih promjena po pitanju izrade i finansiranja izrade šumsko-privredne osnove. Svo finansiranje za državne i privatne šume, po kantonalnom zakonu, snosi Ministarstvo privrede i Uprava za šumarstvo. Takođe, tim zakonom je predviđeno da u fazi radova postoji projektantska kuća koja vrši nadzor i kontrolu izvedenih taksacionih snimanja. U toku snimanja nije vršena kontrola, nego se to retroaktivno radilo i dok se proveo tender i projektantska kuća dok je to uradila tek krajem 2013. godine smo dobili njihovo pozitivno mišljenje. Nakon toga od strane Ministarstva privrede je imenovana komisija koja je vršila pregled šumsko-privredne osnove i nakon utvrđenih nekih nedostataka, izvršili smo korigovanje. Nakon toga, došli smo do ovoga sada, a to je da Općinsko vijeće da suglasnost na ovu šumsko-privrednu osnovu.

MIRSAD ČEHAJIĆ – predstavnik JP "Sarajevo-šume"

Ovdje se radi o stručnoj tematici. Šumsko-privredna osnova je strateški dokument koji se radi za određeno šumsko-privredno područje za period deset godina. U njemu su planirani svi radovi, po obimu, vrsti, vremenu i ona je obavezujuća i garantuje kontinuitet prihoda, troškova i svih ostalih radova. Šumsko-privredna osnova bi se trebala donijeti prije isteka prošle osnove. Mi smo sada u velikom cajtungu. Ova osnova trebalo je da je donešena do 31.12.2012. godine. Reći ću razloge što kasnimo i što nije dobro da kasnim. Prvo, nije bilo federalnog zakona, bila je uredba, pa je uredba ukinuta, pa smo došli u vakum da uopšte nema zakona. Drugo, ne može se 14000 ha pustiti da niko ništa ne radi. Radilo se i mi smo, kao dobri domaćini, na vrijeme počeli sa izradom, iako je bio sporan zakon. Zatim se raspisao tender, izabran izvodžać, pa je došlo do problema oko granične linije, tj. došlo je do preklapanja privatnih i državnih šuma. Naime, došlo je do znatnih preklapanja površina, te je postignut dogovor između Sarajevo-šume i Kantonalne uprave, obzirom da su manje površine privatnih šuma da ostanu iste, a da se ide na uštrb državnih šuma, pa će se u narednih deset godina to etapno rješavati.

Sada smo došli do dijela kada treba pribaviti određene saglasnosti, te između ostalog i saglasnot OV-a, a Vijeće ne može stručno raspravljati o ovome. Ova osnova je u izradi prošla određene stručne komisije.

Ubuduće, prilikom informacije, tražite zvanično od Sarajevo-šuma šta želite i šta tražite.

BESIM GLJIVA – vijećnik Stranke za Srednje

Ovo je odličan momenat, gdje mi možemo djelovati, ne usvajajući ovu odluku. Znamo šta se na terenu dešava sa šumama Ilijaša. Bez obzira na svaki dokument koji nam se ovdje prezentuje, ja vidim da li ima šume ili nema. Želim reći da su posječena i sjemenska stabla, posječeno je sve što se moglo posjeći i sumnjam u svaki dokumenat koji je donesen. Na gornjem kraju se bez ikakvog reda vrši "urbicid" nad šumama, nazovite ga kako god hoćete Svi urbani dijelovi, svi dijelovi gdje su vodozahvati, šuma je isječenja, sječe se šuma koja nije deblja od 35-40 cm. Ja molim ove "svoje" vijećnike (teritorijalno) da stvarno uvide ovo što ja pričam. Mislim da je ovo moment da mi, na neki način, možemo usloviti određene organe. Ja čestitam Sarajevo-šumama, jer "mojih" 100 ljudi radi u ovom preduzeću i nije ovo preduzeće samo krivac. Šuma se uništava, vrši se "genocid" nad ovim našim šumama. Zamolio bih sve da iznađemo način da zaštitimo naše šume, jer ovo je jedino bogatstvo koje imamo.

Rekli ste da je ovaj dokument prošao sve stručne komisije, pa onda nije ni trebala naša saglasnost, ne vidim zašto je uopšte potrebna.

SELVER HERIĆ – vijećnik SDP-a

Davanje saglasnosti je vrlo bitan čin ovog preduzeća i ne slažem se sa Mirsadom da ovo Vijeće ne može stručno raspravljati o ovome. Međutim, ne slažem se sa onim da lokalna zajednica najviše dobiva, jer znamo da preko 50% novca Sarajevo-šume ubiru sa ove općine, a vraćanje kroz projekte nije ni 20% i od tih 20%, deset procenata je od interesa za ovo preduzeće. Da nije bitno ovo Vijeće, da je radila struka kao što reče predstavnik Sarajevo-šuma, ne bi došlo na ovo Vijeće. Ovo je bitno i mi trebamo da sa jednim zaključkom usvojimo ovu odluku. Znači, zaključak treba da dogovorimo da se shodno korištenju šuma na području općine Ilijaš, a posebno na onom dijelu gdje se vrši sječa da se tu ulaže. Najviše se ulaže pred izbore i stranački se ulaže. O stručnosti, kvalitetu i izradi ovog akta ne znam puno, ali treba da donesemo jedan zaključak da narod, općina čije su šume nešto dobiva, a to je preko 50%.

Uslijedila je kratka pauza.

SELVER HERIĆ – vijećnik SDP-a

Sam termin osnova ili temelj ili baza su osnovica da bi poslije osnove mogli djelovati Sarajevo-šume i ostali prateći subjekti. Klub vijećnika SDP-a će podržati ovu odluku, ali vam obećavam i pozivam vijećnike da, ukoliko na izvještajima Sarajevo-šuma i ne realizacije onoga čega su obavezni, a to je povrat sredstava i ulaganja u infrastrukturu općine, stanu na čelo i pozovemo narod da zaštitimo šume tako što ćemo blokirati sječu šume ovom preduzeću.

BESIM GLJIVA – vijećnik Stranke za Srednje

Mi nećemo podržati ovu odluku, osim ako postoji mogućnost da se u sklopu ove odluke donese zaključak koji će na neki način garantovat da se neće dešavati sa šumama sve ono što sam već ranije naveo, sa akcentom na šume na gornjem područja Ilijaša, pogotovo na desnoj strani. Po meni, kao laiku, šumsko-privredna osnova koju danas usvojimo, je temelj svih drugih akata koji budu donošeni u narednom periodu vezano za šume.

Tražim od struke, načelnika, pomoćnika načelnika da oni kao odgovorniji ljudi, kažu šta je

to što u sklopu usvajanja ovog akta, možemo određenim zaključkom tražiti da zaštitimo naše šume.

NIJAZ RASTODER – vijećnik LDS-a

Ja nisam stručnjak za ovo, ali od ovog gospodina iz Sarajevo-šuma nisam ništa čuo, nije nam objasnio šta mi to trebamo usvojiti. Ne vjerujem da može bilo ko bolje zaštititi moju privatnu šumu od mene. Slažem se sa Besimom i znam da mu je teško i razumijem ga i slijedit ću njegovo mišljenje, jer mislim da on ovo dobro poznaje.

NEDIM MATORUGA – vijećnik SDA

Klub vijećnika SDA će podržati šumsko-privrednu osnovu. Mislim da je nekorektno izaći za govornicu i kazati da nećemo podržati ovaj dokument, a da pri tome se ne navede niti jedan nedostatak u ovom dokumentu. Ukoliko gospodo vijećnici smatrate da nešto nije uredu u ovom dokumentu, izađite za govornicu i to kažite. Mislim da je neodgovorno prema našim ljudima koji rade u Sarajevo-šumama i mogu doći u situaciju da ostane bez posla.

BESIM GLJIVA – vijećnik Stranke za Srednje (replika)

Kolega Nedime ja uvažam tvoju brigu za zaposlene u šumarstvu i uvažavam brigu da bi mogli, ne usvajanjem ovog dokumenta, ostatiti bez posla. Međutim, ako nastavimo ovako raditi oni će svakako ostati bez posla vrlo brzo. Upravo o tome ja pričam čitavo vrijeme. Očito je da si ti zamijenio teze, da si priču okrenuo skroz naopako, jer to je svojstveno tebi. Međutim, ne bi trebao tako raditi, ovdje nema politike, ja sam samo zamolio da iznađemo način da zaštitimo šume.

NEDIM MATORUGA – vijećnik SDA (replika)

Očigledno je da ovdje itekako ima politike i ja ponavljam, ukoliko imate bilo šta što ne valja u ovom dokumentu, izađite za govornicu i kažite. Kolega Besime, ja nisam pričao ni o "tvojim", ni o "mojim" ni o "bilo čijim" radnicima, ja ovdje pričam o radnicima ilijašanima koji rade u Sarajevo-šumama koje vi na ovaj način svojom diskusijom, na neki način, stavljate na "led". Po meni, nije rješavanja problema na način da se sve zaustavi i blokira sav proces. Recite mi šta će se desiti ako ne usvojimo ovu osnovu, ako iz toga proizađe da nemamo osnova za rad određenih firmi, ako proizađe da nemamo osnova za donošenje nekih drugih odluka koje puno znače za općinu Ilijaš i Kanton Sarajevo i na kraju koje znače puno za radnike Sarajevo-šuma. Ovdje nema "mojih i tvojih", ovdje je konkretan dokument i ja sam se na to odnio kada sam izlazio prošli put za govornicu.

AKIF FAZLIĆ – općinski načelnik

Želim sve nas podsjetiti da smo zaključcima ovog Vijeća tražili da se što prije donese šumsko-privredna osnova. Ona je istekla krajem 2012. godine i ovo Vijeće je dovoljno odgovorno da je shvatilo šta znači raditi bez šumsko-privredne osnove i svojim zaključcima tražilo da se što prije donese nova osnova. Danas smo konstatirali da ona gotovo dvije godine kasni i da to jeste problem. Raditi na bazi godišnjeg plana i raditi na bazi osnove su sasvim dvije različite stvari i jako je bitno da što prije završimo period koji je omogućavao Sarajevo-šumama i svim ostalima da rade na bazi planova nego da

pređemo na šumsko-privredne osnove. To je broj jedan i meni je zadovoljstvo da je to na dnevnom redu danas. Takođe ću vas podsjetiti da smo vratili sa ovog Vijeća prvu varijantu šumsko-privredne osnove, jer su pronađene greške koje su sada ispravljene. Druga stvar, kada je u pitanju osnova da se vratimo i na struku. Mi ovdje donosimo politiku, a struka je utvrdila osnovu. Šumsko-privrednu osnovu su radile BH Šume. Znači, institucija koja se isključivo bavi projektovanjem u šumarstvu i mislim da nema merotirnije institucije za donošenje šumsko-privrednih osnova. Oni rade osnove na cijelom području Federaciji BiH. Revident ove osnove je bio stručni tim koji je formiralo Ministarstvo privrede. Ova osnova ima preko 700 stranica i taj dokument, ako neko želi, može se staviti na uvid.

Treće, kada je u pitanju donošenje zaključaka, ja nisam za to da danas donosimo bilo kakve zaključke, nego tražim od Vijeća da damo suglasnost na ovu osnovu, jer je ova osnova upravo taj zaključak, ona definiše politiku sječa, obaveze, i ostalo. To je puno obuhvatnije i zahtjevnije, nego bi smo mi zaključkom tražili.

Ne donošenje osnova, prije svega, šteti u smislu da nećemo imati adekvatne parametre da pratimo dalji rad, i dalje će se rad odvijati otežano na bazi inspekcijskih kontrola i to nam ne treba. Zbog toga, još jedanput predlažem Općinskom vijeću da da suglasnost na osnovu. Po programu rada Općinskog vijeća u maju imamo izvještaj o radu Sarajevo-šuma i Kantonalne uprave za šumarstvo i možemo tada pričati o svemu ovome što smo danas pričali kako se provodi politika upravljanja šumama.

NIJAZ MAŠIĆ – vijećnik SBB BiH

U obrazloženju odluke piše da je priložena elektronska verzija, ali ja nisam u upoznat sa tim i svi diskutanti nisu govorili da li su osnove pozitivne ili negativne po Ilijaš. U svakom slučaju treba nastaviti raditi, ali treba znati po kojoj osnovi i u kojoj mjeri. Da li sada glasanjem onemogućiti da prestane raditi preduzeće ili da umanji se dio posla, ili glasati "ućoravo" pa nek ide kako je do sada bilo. Ako je do mene greška da je ovo stiglo na moju adresu, a ja nisam pročitao, ja ne mogu ovo podržati kao čovjek, bez obzira na stav kluba, da mi se nešto potura i raspravljamo dva sata, a niko ne govori o parametrima da li osnovu treba mijenjati, koliko je ispravna itd.

ADEM EFENDIĆ – vijećnik SBB BiH

Obzirom da ovdje postoji dosta nas koji nisu pročitali ovaj dokument od 700 stranica i da bi trebali biti upućeniji, predlažem da se postupi u skladu sa članom 125. stav 4. Poslovnika Općinskog vijeća Ilijaš. Znači, da donesemo zaključak i da se odluka vrati i doradi i pripremi za narednu sjednicu.

Obzirom da diskutanata po ovoj tački dnevnog reda više nije bilo, predsjedavajući je dao na glasanje prijedlog vijećnika Adema Efendića da se tačka vrati i predloži na narednoj sjednici Općinskog vijeća Ilijaš.

Općinsko vijeće je glasalo sa 7 ZA, 11 PROTIV i 3 UZDRŽANA.

Konstatovano je da prijedlog nije dobio potrebnu većinu.

Zatim je predsjedavajući dao na glasanje prijedlog Odluke.

Općinsko vijeće je sa 14 glasova ZA i 7 UZDRŽANIH donijelo

Odluku o davanju pozitivnog mišljenja na ŠPP "Gornjebosansko"-dio

AD-6

Prijedlog Odluke o neposrednoj pogodbi za prodaju neizgrađenog građevinskog zemljišta
(k.č.br.265/9 i k.č.br.265/10)

Diskutanata po ovoj tački dnevnog reda nije bilo, pa je Općinsko vijeće sa 21 glasom ZA i 1 PROTIV donijelo

Odluku o neposrednoj pogodbi za prodaju neizgrađenog građevinskog zemljišta
(k.č.br.265/9 i k.č.br.265/10)

AD-7

Prijedlog Rješenja:

- a) o razrješenju člana, a time i zamjenika predsjednika Komisije za prostorno uređenje, stambeno-komunalne poslove i ekologiju
- b) o izboru člana, a time i zamjenika predsjednika Komisije za prostorno uređenje, stambeno-komunalne poslove i ekologiju
- c) o razrješenju člana Komisije za boračka pitanja
- d) o izboru člana Komisije za boračka pitanja
- e) o izboru člana Komisije za mlade i obrazovanje

NEDIM MATORUGA - vijećnik SDA (predsjednik Komisije za izbor i imenovanja)

Političke partije BPS-Sefer Halilović i Stranka za Srednje su podnijeli zahtjeve Komisiji za izbor i imenovanja da se njihovi članovi iz određenih komisija zamjene i da se imenuju novi članovi. Komisija za izbor i imenovanja je to prihvatila i prijedlog prosljedila Općinskom vijeću.

Diskutanata po ovoj tački dnevnog reda nije bilo pa je Općinsko vijeće jednoglasno donijelo

Rješenja:

- a) o razrješenju člana, a time i zamjenika predsjednika Komisije za prostorno uređenje, stambeno-komunalne poslove i ekologiju
- b) o izboru člana, a time i zamjenika predsjednika Komisije za prostorno uređenje, stambeno-komunalne poslove i ekologiju
- c) o razrješenju člana Komisije za boračka pitanja
- d) o izboru člana Komisije za boračka pitanja
- e) o izboru člana Komisije za mlade i obrazovanje

AD-8

Prijedlog Rješenja iz imovinsko-pravne oblasti:

- a) broj:06/1-31-659/14
- b) broj:06/1-31-4183/13

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenja iz imovinsko-pravne oblasti:

- a) broj:06/1-31-659/14
b) broj:06/1-31-4183/13

AD-9

Prijedlog Zaključka kojim se utvrđuje javni interes za općinu Ilijaš izgradnja kompleksa proizvodnih objekata (farme za tov pilića sa preradom)

AKIF FAZLIĆ – općinski načelnik

Iz pisma namjere se vidi koja vrsta investicije se radi i šta je djelatnost potencijalnog investitora. Mi u provođenju općinske politike u smislu razvoja, razvoja privrede, zapošljavanja, podržavamo sve potencijalne investitore koji mogu u duhu prostornog plana i duhu zakona realizirati svoje investicije. Ovdje se radi o lokalitetu koji je dijelom vlasnički riješen i koji je u fazi daljeg vlasničkog rješavanja i koji je na lokalitetu izvan urbanog područja i kao takvo nemoguće je za gradnju ili pretvaranje šumskog u građevinsko zemljište. Da bi se stvorile pretpostavke da se može tu graditi i vršiti pretvorba ovog zemljišta potrebno je da se izvan ovog urbanog obuhvata napravi provedbena dokumentacija vjerovatno u nivou urbanističkog projekta čija bi se izrada pokrenula kod Zavoda za planiranje Kantona Sarajevo ako zaista ovo Vijeće cijeni da jeste interes općine Ilijaš za jednom ovakvom investicijom.

Diskutanata po ovoj tački dnevnog reda više nije bilo, pa je Općinsko vijeće jednoglasno donijelo

Zaključak kojim se utvrđuje javni interes za općinu Ilijaš izgradnja kompleksa proizvodnih objekata (farme za tov pilića sa preradom)

AD-10

Informacija o uspjehu i odgoju učenika u osnovnim i srednjim školama, na području općine Ilijaš u školskoj 2013/2014. godini

SANJA ZAGORAC-JOZIĆ – pomoćnica načelnika za društvene djelatnosti

Planom i programom rada Općinskog vijeća Ilijaš za 2014. godinu, planirano je da se Općinsko vijeće informiše o uspjehu i odgoju učenika u osnovnim i srednjim školama, na području općine Ilijaš u školskoj 2013/2014. godini.

Odgojno obrazovni proces u Osnovnoj školi "Hašim Spahić" u Ilijašu u protekloj školskoj godini bio je organizovan u centralnoj školi u Ilijašu, te u područnim školama u Misoči, Malešićima i Bioči. Od ukupno 988 učenika koji su bili predmet ocjenjivanja odličan uspjeh postiglo je 552 učenika ili 55,87%, 263 učenika ima vrlo dobar uspjeh ili 26,61%, 161 učenik ima dobar uspjeh ili 16,29%, 12 učenika ima dovoljan uspjeh ili 1,21%. Dakle, pozitivan uspjeh imalo je 988 učenika što u procentima iznosi 100%.

Procenat prolaznosti u školskoj 2013./2014. godini iznosi 100%, što je u odnosu na prošlu 2012/2013. školsku godinu (100%) identičan, srednja ocjena koja je u školskoj 2013./2014. godini 4,29 i manja je za 0,04 poena u odnosu na školsku 2012/2013.godinu kada je bila 4,33. U segmentu odgoja na kraju školske 2013/2014.godine 1111 učenika imalo je primjerno vladanje ili 99,37%.

U Osnovnoj školi "Podlugovi" u Podlugovima nastavu u školskoj 2013/2014. godini pohađalo je 472 učenika raspoređenih u 23 odjeljenja od prvog do devetog razreda. Odgojno obrazovni proces se odvijao u tri školska objekta: Centralnoj školi u Podlugovima

sa 18 odjeljenja, područnoj četverorazrednoj školi u Ljubničima sa 1 kombinovanim odjeljenjem i 2 čista odjeljenja i područnoj četverorazrednoj školi u Lješevu sa 2 kombinovana odjeljenja.

Od 426 učenika koji su bili predmet ocjenjivanja odličan uspjeh je postiglo 212 učenika ili 49,80%, 148 učenika ima vrlo dobar uspjeh ili 34,70%, 63 učenika ima dobar uspjeh ili 14,80%, 3 učenika ima dovoljan uspjeh ili 0,70%. Dakle, pozitivan uspjeh imalo je 426 učenika što u procentima iznosi 100%. Procenat prolaznosti u školskoj 2013/2014. godini iznosi 100%, što je u odnosu na prošlu školsku 2012/2013. godinu identično. Srednja ocjena koja je u ovoj školskoj godini 4,34 je veća za 0,02 poena u odnosu na školsku 2012/2013. godinu kada je bila 4,32. U segmentu odgoja, na kraju školske 2013/2014. godine 465 učenika je imalo primjerno vladanje ili 98,52%. U poređenju sa školskom 2012/2013. godinom, ovaj procenat je manji za 0,28%, kada je broj učenika koji su imali primjereno vladanje iznosio 98,80%.

Obrazovno-odgojni proces u Osnovnoj školi "Srednje" u Srednjem u školskoj 2013/2014. godini organizovano se izvodio u centralnoj školi u "Srednjem", te u područnim četverorazrednim školama u Gajevima, Dragoradima i Kamenici. Nastavu je pohađalo 282 učenika raspoređenih u 18 odjeljenja. U centralnoj školi u "Srednjem" učenici su bili raspoređeni u 12 odjeljenja, u područnoj školi u "Gajevima" nastavu su pohađali u dva kombinovana odjeljenju (I i III; II i IV razred), u područnoj školi "Kamenica" nastavu su pohađali u dva kombinovana odjeljenja (I i III; II i IV) i u područnoj školi "Dragoradi" nastavu su pohađali u dva kombinovana odjeljenja (I i III; II i IV razred). Od 248 učenika koji su bili predmet ocjenjivanja odličan uspjeh je postiglo 126 učenika ili 50,40%, 73 učenika ima vrlo dobar uspjeh ili 29,20%, 44 učenika ima dobar uspjeh ili 17,60%, 5 učenika ima dovoljan uspjeh ili 2%. Dakle, pozitivan uspjeh imalo je 248 učenika što u procentima iznosi 99,20%. Procenat prolaznosti u školskoj 2013/2014. godini iznosi 99,20%, što je u odnosu na školsku 2012/2013. godinu manje za 0,80%. Srednja ocjena koja je u školskoj 2013/2014. godini 4,29 i veća je za 0,07 poena u odnosu na školsku 2012/2013. godinu kada je bila 4,22. U segmentu odgoja na kraju školske 2013/2014. godine 280 učenika ima primjerno vladanje ili 98,20%. U poređenju sa školskom 2012/2013. godinom ovaj procenat je veći za 0,17%. Nastavu u Osnovnoj privatnoj školi "Đulistan" u Lješevu u školskoj 2013/2014. godini pohađalo je 292 učenika raspoređenih u 14 odjeljenja. Od 243 učenika koji su bili predmet ocjenjivanja odličan uspjeh je postiglo 166 učenika ili 68,31%, 67 učenika imalo je vrlo dobar uspjeh ili 27,57%, dobar uspjeh imalo je 10 učenika ili 4,12%. Dakle, pozitivan uspjeh imalo je 243 učenika što u procentima iznosi 100%. Procenat prolaznosti u školskoj 2013/2014. godini je identičan u odnosu na školsku 2012/2013. godinu. Srednja ocjena koja je u školskoj 2013/2014. godini 4,38 i manja je za 0,25 poena u odnosu na školsku 2012/2013. godinu kada je bila 4,63.

JU Srednjoškolski centar "Nedžad Ibrišimović" Ilijaš - Nastavu u školskoj 2013/2014. godini pohađalo je 489 učenika koji su bili raspoređeni u 21 odjeljenje. Od ukupnog broja učenika razred je sa uspjehom završilo 473 učenika ili 96,73%, a na ponavljanje razreda upućeno je 12 učenika ili 4,38%. Odličan uspjeh postiglo je 86 učenika ili 17,59%, 174 učenika ima vrlo dobar uspjeh ili 35,58%, 183 učenika ima dobar uspjeh ili 37,42%, 30 učenika ima dovoljan uspjeh ili 6,13%. Neocjenjenih učenika je bilo 4. Procenat prolaznosti u školskoj 2013/2014. godini iznosi 96,73%, što je u odnosu na školsku 2012/2013. godinu, kada je iznosio 93,87%, veći za 2,86%. Srednja ocjena koja je u školskoj 2013/2014. godini 3,60 i veća je za 0,07 poena u odnosu na školsku 2012/2013. godinu kada je bila 3,53. U segmentu odgoja, na kraju školske 2013/2014. godine primjerno vladanje imalo je 306 učenika ili 62,58%, vrlo dobro vladanje ima 49 učenika ili 10,02%, dobro vladanje 49 učenika ili 10,02%, zadovoljavajuće vladanje 19 učenika ili 3,89%, a loše vladanje 62

učenika ili 12,68%.

“Perzijsko bosanski koledž sa internatom” Ilijaš - Lješevu u školskoj 2013/2014. godini pohađalo je 72 učenika raspoređenih u 4 odjeljenja, što je u odnosu na školsku 2012/2013. godinu manje za 17 učenika, kada je bilo 89 učenika. Od ukupno 72 učenika, odličnih učenika bilo je 29 ili 40,20%, vrlo dobrih učenika 34 ili 47,20%, dobrih učenika 10 ili 13,90%. Dakle, pozitivan uspjeh imalo je 72 učenika što u procentima iznosi 100%. Procenat prolaznosti u školskoj 2013/2014. godini je identičan u odnosu na školsku 2012/2013. godinu. Srednja ocjena koja je u školskoj 2013/2014. godini 4,12 i manja je za 0,34 poena u odnosu na školsku 2012/2013. godinu kada je bila 4,46.

Diskutanata po ovoj tački dnevnog reda nije bilo, pa je Općinsko vijeće primilo k znanju

Informaciju o uspjehu i odgoju učenika u osnovnim i srednjim školama, na području općine Ilijaš u školskoj 2013/2014. godini

Zatim je predsjedavajući Damir Filipović zaključio 23. sjednicu OV-a u 12:10h.

Zapisničar:
Maida Habibović

PREDSJEDAVAJUĆI
OPĆINSKOG VIJEĆA ILIJAŠ
Damir Filipović, dipl.pravnik

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ovilijas@bih.net.ba
Broj certifikata:20938

